

**Suliffeqarfiup sullitallu akornanni allaganngorlugit isumaqatigiissusiarisartakkamik kalaallisujutillugit sullitaminnut neqeroorutiginneqquisissummik suliffeqarfiit aningaasarsiornermik ingerlataqartut peqquneqarsinnaanerannik periarfissanik misissuinnermut atugassamik nassuiaasiamik suliaqarnissamik Naalackersuisut peqquneqarnissaat pillugu Inatsisartut aalajangiiffigisassaattut siunnersuut.**

(Inatsisartunut ilaasortaq, Erik Jensen, Siumut)

### **Akissutitut allakkiaq**

(Inuussutissarsiornermut Aatsitassanullu Naalackersuisoq)

### **Siullermeerneqarnera**

Naalackersuisut sinnerlugit aalajangiiffigisassatut siunnersuut pillugu Inatsisartuni ilaasortaq Erik Jensen, Siumut, qutsavigerusuppara.

Sullitat oqaatsit kissaatigisatik atorlugit ilitersorneqarsinnaanissaat Naalackersuisunit pingaartinneqarpoq. Taamaattumik iluarisimaarnarpoq nunatsinni suliffeqarfiit aningaasarsiornermik ingerlarlataqartut tamanna pingaartitarereermassuk. Assersuutigalugit GrønlandsBankenimi sulisut 80 %-ii kalaallit oqaasiinik atuisuupput, sullitallu oqaatsit kissaatigisaat atorlugit ilitersuisoqartarluni.

Taamaattorli aningaasaqarnermik suliassaqaarfik Kalaallit Nunaannit tiguneqarsimangilaq, taamaattumillu suliassaqaarfiup iluani inatsisiliornissaq Naalagaaffiup oqartussaaffianiilluni.

Aningaasaliisarnermik suliffeqarfinnut ileqqorissaarnissaq pillugu Kalaallit Nunaannut nalunaarut nr. 252, 1. april 2005-imeersumi § 4 naapertorlugu Kalaallit Nunaanni suliffeqarfiit aningaasaqarnermik ingerlatsisut sullissisarfiit sullitaminnik isumaqatigiissutitik allaganngorlugit sularisarnissaannut pisussaaffeqarput.

Taamaattorli allaganngorlugit isumaqatigiissutaasunut oqaatsitsunut tunngasunik piumasqaateqartoqanngilaq, taamaattumillu suliffeqarfiit aningaasarsiornermik ingerlataqartut isumaqatigiissutini kalaallit imaluunniit danskit oqaasiinik atuisussaanermik pisussaaffiligaanatik.

Allaganngorlugit isumaqatigiissutinut oqaatsit tungaatigut malittarisassiamik nutaamik eqqussisoqarnissaa kissaatigineqassappat nalunaarut allanngortinneqassaaq. Taamatut iliortoqassappat Naalagaaffimmi oqartussanit suliffeqarfiit aningaasaqarnermik ingerlatsisut pillugit inatsit nr. 1447 allanngorneqartariaqarpoq.

Aningaasanut tunngatillugu isumaqatigiissutit kalaallisut allassimanissaannik peqqussuteqalissagaluarpat, Oqaasileriffiup paasissuutissiissutigaa qallunaat taaguusersueriaasiat nassuiaariaasiallu atorneqarsinnaasoq. Taamaaliortoqassappallu inatsisilerinikkut taaguusersuutit 6000-it tikillugit sularineqartussaanerat tamatuma nassatarissavaa.

Taamaattumik siunnersuut taama ittoq ilimanartumik Naalagaaffimmi oqartussaasoqarfinit suliarineqassasoq, atuutsilersissaneralu isumalluuterpassuarnik pisariaqartitsissasoq ilisimareerparput. Taamaattumik paasisat tunngavileqqinniarlugit isumalluutitik qanoq atuisoqartigissanersoq nassuiaasiortoqartariaqanngilaq.

Naalakkersuisut paarlattuanik kissaatigaat tigussaasunik suliniutitik aallartittisoqarnissaa.

Namminersornermi inatsimmi §20 -mi allassimasoq tassa kalaallisut oqaatsit pisortatigoortumik oqaasiusut naammassineqarnissaa kissaatigaarput. Taamaattumik aamma oqaatsinut politikki pillugu Inatsisartut inatsisaat nr. 7, 19. maj 2010-meersoq eqqunneqarnissaa sulissutigaarput. Taassuma suliffeqarfiit minnerpaamik qulinik sulisullit oqaatsinut politikkiornissaannik suliaqaaqquai. Oqaatsinut politikki assersuutigalugu suliffiup iluani avataanilu attaveqaaqatigiinnernut malittarisassianik imaqaarsinnaavoq.

Taamaattumik oqaatsinut politikki ingerlataq ingerlatiinnarusupparput, ajornartorsiutinut tigussaasunik ingerlatsisoqassaaq taamaasiornikkut aningaasanut tunngatillugu isumaqatigiissutit kalaallisut allassimalerniassammata. Taamaattumik ajornartorsiutip ersarissarneqarnissaa siunertaralugu Naalakkersuisut kissaatigaat Naalagaaffimmi oqartussat attavigineqassasut.

Naalakkersuisut taama tunngaviliillutit allannguutissatut ima siunnersuuteqarput:

**”Suliffeqarfiup sullitalu akornanni allaganngorlugit isumaqatigiissusiarisartakkamik kalaallisujutillugit sullitaminnut neqerooruteqartoqartalernissaa Naalakkersuisut Naalagaaffimmi oqartussanut misissorneqarnissaanik kissaateqarnermik saaffiginnittoqarnissaa pillugu Inatsisartut aalajangiiffisassaattut siunnersuut.”**